



Bybelstudie 1

KRUISPAD

(waar God ons roep)

Met ons veldtog vir 2014 –PADLANGS- wil ons die fokus plaas op ons daaglikse lewe agter die Here aan.

Dit handel oor ons **geestelike reis elke dag** saam met die Here en binne die situasie waarin elkeen van ons ons nou bevind! Ons is nou hiér... maar ons is hier ook elke dag op reis saam met die Here! En daarvoor het ons nodig om padlangs te kan praat!

Daar is drie sake wat ons voortdurend in ons gesprekke in gedagte moet hou:

- Ons is ons **hele lewe lank op reis** en *arriveer* nooit op aarde nie;
- Die boek Eksodus handel oor die Israeliete se **bevryding uit slawerny**. Ons het egter almal bevryding nodig;
- **Israel se identiteit word gevorm op hierdie pad** agter die Here aan deur die woestyn. Net so wil die Here ons identiteit vorm soos ons agter Hom aan leef.

1. Inleiding

‘n Paar definisies van die woord “padlangs”

¹ (bw) Al met die pad langs; sonder om van die pad af te wyk

² Reguit, sonder omweë, eerlik, eerlik handel, reguit praat, geen doekies omdraai nie, iemand reguit sê hoe sake staan, onomwonde die waarheid praat.

Watter verwagtings is daar by julle oor so ‘n gemeentewye veldtog aan die begin van elke jaar?

2. Kyk saam as kleingroep na die video van week 1

Watter sake uit die video tref julle?

3. Lees Eksodus 3:1-14 en Eksodus 4:1-17

4. Deel met mekaar wat julle tref in hierdie gedeelte

5. ‘n Paar gedagtes oor die teks

Dwarsdeur die Bybel lees ons dat God mense roep. God roep nie net individue vir spesifieke opdragte nie, maar in die Ou Testament ook vir Israel as volk en in die Nuwe Testament die kerk vir ‘n spesifieke rol.

Roeping is daardie punt van jou lewe waar jy 'n nuwe ontmoeting met die Here het. Gewoonlik gaan dit saam met 'n onverwagse nuwe raaksien en opnuut hoor van wie God is, saam met 'n duideliker verstaan van God se aanspraak op jou lewe. Israel is al vir 400 jaar slawe in Egipte. Moses word groot in hierdie Egipte, maar in die koning se paleis. Nadat hy 'n Egiptenaar doodsla en uitgevang word, vlug hy vir sy lewe. In die woestyn begin hy 'n nuwe lewe as skaapboer. En dit is hier, terwyl hy skape oppas, dat hierdie ontmoeting tussen hom en die Here plaasvind.

6. Besprekingsvrae

- a. Die verskynsel van die doringbos wat brand (**3:2-3**) was iets vreemd vir Moses en dit het dadelik sy aandag getrek. Watter goed doen die Here soms om mense se aandag te trek?
- b. God roep Moses op sy naam (**3:4**). God ken Moses reeds. Hy weet alles van hom af, ken sy hele storie. God weet ook presies wat besig is om met die Israeliete te gebeur (**3:7-9**). As dit ook waar is van ons, hoe laat dit jou voel dat God alles van jou af weet?
- c. God het 'n plan. Wat is sy spesifieke plan vir die Israeliete (**3:7-10**)? God het dieselfde plan vir ons, naamlik om ons te bevry. Wat is daar waarvan ons bevryding nodig het?
- d. As God Moses roep het Moses allerhande verskonings. Gewoonlik wanneer God naderkom, is mense se eerste reaksie vrees en wil hulle wegkruip. Een van die beste maniere waarop ons dink ons dit doen, is met allerhande verskonings. Watter verskonings het Moses in die volgende verse en wat kon dit beteken: **3:11; 3:13; 4:1; 4:10; 4:13**?
- e. Watter verskonings het ons gewoonlik wanneer God aanspraak maak op ons lewens, tyd, mense en geld?
- f. Net soos Moses, dink ons gewoonlik heel eerste aan maniere hoe ons kan wegkom van God se aanspraak/roeping op ons lewens. Ons het egter nie die laaste sê nie en ons verskonings skrik nie vir God af nie! Wat is God se antwoord/versekering/belofte op elkeen van Moses se verskonings en wat sou dit kon beteken: **3:12; 3:14; 4:2-9; 4:11-12; 4:14-17**?
- g. Moses kon baie maklik by die brandende doringbos verby gestap het. God dwing ons baie min direk tot stilstand. Dit bly ons keuse of ons onself aan God se openbaring wil steur. In die Bybel is daar baie verhale van mense wat wegdraai. By hierdie kruispad, wat gaan maak dat jy jou aan God gaan steur?

7. Watter uitdaging stel hierdie gedeelte aan ons alledaagse lewe?

(Onthou om julle gedagtes te deel op Facebook!)

8. Gebed & Afsluiting